

आकाशवाणी रायपुर (छत्तीसगढ़)  
प्रादेशिक समाचार (छत्तीसगढ़ी)

1810 सोमवार

26.08.2024

प्रमुख समाचार –

- 1— राज्य सरकार ह ऑनलाइन महादेव सट्टा ऐप के जांच सीबीआई ल सौंप देहे—एखर अधिसूचना जारी कर दे गेहे।
- 2— बीजापुर जिला म 25 झिन माओवादी मन ह करीन आत्मसमर्पण।
- 3— भगवान श्री कृष्ण के जन्मोत्सव, जन्माष्टमी आज छत्तीसगढ़ समेत देस के आने—आने जघा मन म श्रद्धा अउ आस्था के संग मनाय जावत हे।

महादेव सट्टा—सीबीआई जांच

राज्य सरकार ह ऑनलाइन महादेव सट्टा ऐप के जांच सीबीआई ल सौंपे खातिर अधिसूचना जारी कर दे हवय। उपमुख्यमंत्री अउ गृहमंत्री विजय शर्मा ह बतइन कि ए मामला म प्रदेस के आने—आने थाना, ईओडब्ल्यू अउ ए.सी.बी. म दर्ज जम्मो 70 ठिन केस सीबीआई ल ट्रांसफर करे के प्रक्रिया सुरु कर दे गे हवय। ओमन बतइन कि केंद्रीय जांच ब्यूरो जल्दी मामला के जांच सुरु करही।

गौरतलब हे कि प्रवर्तन निदेशालय—ईडी ह ए मामला म 11 झिन लोगन मन ल गिरफ्तार करीन हवय।

माओवादी—आत्मसमर्पण

बीजापुर जिला म 25 झिन माओवादी मन ह आत्मसमर्पण कर दीन हे। 29 लाख रुपिया के इनामी ए माओवादी मन ह पुलिस अधीक्षक अउ सीआरपीएफ के डीआईजी के आगू आत्मसमर्पण करीन।

पुलिस अधीक्षक जितेन्द्र कुमार यादव ह बतइन कि आत्मसमर्पण करइया 3 झिन माओवादी मन उपर 8—8 लाख, एक माओवादी उपर 3 लाख अउ दू एल.ओ.एस. सदस्य मन उपर एक—एक लाख रुपिया के इनाम घोसित रिहीस। ओमन बतइन कि ए जम्मो माओवादी मन टेकलु गुडेम, मिनपा अउ गंगालूर म होय माओवादी घटना मन म सामिल रिहीन। ए घटना म उनतालिस जवान मन सहीद होगे रिहीन। पुलिस अधीक्षक ह बतइन कि राज्य सरकार के पुर्नवास नीति के चलत जम्मो खुद समर्पण करे माओवादी मन ल 25—25 हजार रुपिया दे गीस।

युनिफाइड पेंशन स्कीम—प्रेसवार्ता

केंद्र सरकार के यूनिफाइड पेंसन स्कीम—यू.पी.एस. के संबंध म दक्षिण पूर्व मध्य रेलवे के रईपुर रेल मंडल म आज बिस्तार ले जानकारी दे गीस। ए संबंध म अपर मंडल रेल प्रबंधक बजरंग अग्रवाल, वरिष्ठ मंडल वाणिज्य प्रबंधक अवधेश कुमार त्रिवेदी, मंडल कार्मिक अधिकारी राहुल गर्ग अउ मंडल वित्त प्रबंधक शिवाशिष कुमार ह प्रेसवार्ता लेके योजना के मुख्य बात के जानकारी दीन।

अधिकारी मन बतइन कि कर्मचारी मनके 25 बछर के न्यूनतम सेवा पूरा होय म रिटायर के पहिली आखिरी बारह महिना म मिले औसत मूल वेतन के 50 प्रतिशत निश्चित पेंसन के रूप म दे जाही। ओमन बतइन कि ए वेतन कम से कम 10 बछर के सेवा के बेरा तक कम सेवा अवधि खातिर अनुपातिक होही। उहें, सुनिश्चित परिवारिक पेंसन के रूप म कर्मचारी के मउत ले ठीक पहिली ओखर पेंसन के 60 प्रतिशत दे जाही। पत्रकारवार्ता म बताय गीस कि सुनिश्चित

न्यूनतम पेंसन के रूप में कम से कम 10 बछर के सेवा के बाद रिटायर होय में 10 हजार रुपिया हर माह दे जाही।

उहें, औद्योगिक श्रमिक मन खातिर अखिल भारतीय उपभोक्ता मूल्य सूचकांक के आधार में महंगाई राहत दे जाही। एखर अलावा सैन्य कर्मचारी मनके मामला में रिटायर होय के बेरा ग्रेच्युटी के अलावा एकमुस्त भुगतान, सेवा के हरेक पूरा करे गे 6 महिना खातिर, रिटायर होय के तारिख में वेतन अउ डीए के 10वां हिस्सा दे जाही। ए भुगतान ले सुनिश्चित करे गे पेंसन के धनराशि कम नइ होही।

### सरकार-फर्जी लिंक खंडन

केंद्र सरकार ह वित्त मंत्रालय ले 46 हजार रुपिया ले जादा के वित्तीय सहायता देवय के दावेदारी करइया लिंक ल फर्जी बताय हे। एक ठिन सोसल मीडिया पोस्ट में सूचना अउ प्रसारण मंत्रालय के फैंक्ट चेक इकाई ह फर्जी समाचार के भंडाफोड़ करीन हे। इकाई ह बतइन कि एखर संचालन गरीबहा मन ल वित्तीय सहायता देवय के आड़ में मैसेजिंग ऐप के जरिया करे गे हवय। संदेस प्राप्त करइया मन ल एक ठिन फर्जी लिंक के जरिया अपन खुदके जानकारी देबर केहे गे हवय। मंत्रालय ह अइसन कोनो भी दावेदारी के खंडन करत ए लिंक ल फर्जी बताय हवय।

### जवान-मौत

दंतेवाड़ा जिला के बारसूर थाना क्षेत्र के केंद्रीय रिजर्व पुलिस बल- सी.आर.पी.एफ. कैम्प में पदस्थ एक जून जवान ह खुदेच ल गोली मारके आत्महत्या कर लीन। मिले जानबा के मुताबिक सी.आर.पी.एफ. के एक सौ पंचानवीं बटालियन के जवान विपिन्द्र चंद्र ह आज बिहनिया अपन बैरक में एके-सैंतालीस रायफल ले खुद के उपर फायर कर दीस। घायल जवान ल तुरते दंतेवाड़ा जिला अस्पताल पहुंचाय गीस, जिहां डॉक्टर मन ह ओला मृत घोसित कर दीन।

### जन्माष्टमी

भगवान श्री कृष्ण के जन्मोत्सव, जन्माष्टमी आज छत्तीसगढ़ समेत देस के आने-आने जघा मन में श्रद्धा अउ आस्था के संग मनाय जावत हे। ए मउका में प्रदेश के कृष्ण मंदिर मन में जन्मोत्सव बर जरूरी तियारी करे गे हवय। मंदिर अउ घर मन में आज रतिहा भगवान श्रीकृष्ण के बिसेस रूप ले पूजा-पाठ करके जन्मोत्सव मनाय जाही। भगवान श्रीकृष्ण ल माखन-मिश्री के संग आने कई ठिन चीज के भोग लगाय जाही।

इही बीच, राजधानी रईपुर में घलो श्रीकृष्ण मंदिर मन में बिसेस साज-सज्जा करे गेहे। मंदिर मन ल रंग-बिरंगा रोसनी ले सजाय गे हवय। ए मउका में श्रीकृष्ण के बाल-गोपाल रूप के श्रृंगार कर बिसेस कपड़ा पहिराय जाही। राजधानी में टाटीबंध के इस्कॉन मंदिर, समता कॉलोनी के राधा-कृष्ण मंदिर अउ मठपारा के दूधाधारी मठ में बिहनियच ले श्रद्धालु मनके भीड़ लगे हुए हे।

राष्ट्रपति द्रौपदी मुर्मू, उपराष्ट्रपति जगदीप धनखड़, प्रधानमंत्री नरेंद्र मोदी अउ छत्तीसगढ़ के मुख्यमंत्री विष्णुदेव साय ह लोगन मन ल जन्माष्टमी के अपन सुभकामना दीन हे।

### राज्य स्तरीय-उल्लास मेला

मुख्यमंत्री विष्णुदेव साय अंतर्राष्ट्रीय साक्षरता दिवस के मउका म अवइया 8 सितंबर के राज्य स्तरीय उल्लास मेला म 'उल्लास साक्षरता' अभियान के सुरुआत करही। राज्य साक्षरता मिसन प्राधिकरण एस.सी.ई.आर.टी. के संचालक राजेन्द्र कटारा ह बतइन कि राजधानी रईपुर के पंडित दीनदयाल उपाध्याय ऑडिटोरियम म आयोजित होवइया राज्य स्तरीय उल्लास मेला म प्रदेश के आने-आने जिला ले चुने गे दस ठिन स्टाल लगाय जाही। उल्लास साक्षरता अभियान के सुरुआत कारीकरम अउ मेला के प्रसारण सोसल मीडिया के जरिया जम्मो ब्लाकमुख्यालय अउ पंचायत स्तर म करे जाही। ओमन किहीन कि उल्लास कारीकरम म ब्रान्ड एम्बेसडर घलो बनाय जाही। साक्षरता अभियान म योगदान देवइया दसवीं अउ बारहवीं बोर्ड परीक्षा के पढइया लइका मन ल बोनस अंक घलो दे जाही।

### आईटीबीपी-फील्ड अस्पताल

माओवाद प्रभावित नारायणपुर जिला के अबूझमाड़ म भारतीय तिब्बत सीमा पुलिस बल -आईटीबीपी के तिरपनवीं वाहिनी डहार ले सीओबी आकाबेड़ा म 6 बिस्तर वाले फील्ड अस्पताल बनाय गे हवय। आईटीबीपी के महानिदेशक राहुल रसगोत्रा ह काली 25 अगस्त के अस्पताल के वर्चुअल उद्घाटन करीन। एखर ले जिहां स्थानीय रहइया मन ल अच्छा स्वास्थ्य सुविधा मिलही। उहें, सुरक्षाकर्मी मन ल घलो फायदा होही।

### दुर्घटना

दुरूग जिला के पाटन थाना क्षेत्र म काली संज्ञा होइस एक सड़क दुर्घटना म दू जिन लोगन मनके मउत होगिस। उहें, दू जिन आने मनखे मन घायल होगिन हवय, जेमन ल अस्पताल म भर्ती कराय गे हवय। पाटन थाना प्रभारी अनिल साहू ह बतइन कि एक ठिन चारपहिया गाड़ी गांव अरसनारा चौक के तीर अंते-तंते होके पेड़ ले टकरा गीस। ए हादसा म गाड़ी चलइया अउ एक जिन आने मनखे के मउत होगिस।

### आसिफ अली-गोल्ड मेडल

भिलाई के पावर लिफ्टर आसिफ अली ह राष्ट्रीय पॉवर लिफ्टिंग प्रतियोगिता म गोल्ड मेडल जीते हे। कोलकाता म 20 ले 25 अगस्त तक आयोजित पचासवां गोल्डन जुबली, सीनियर राष्ट्रीय पॉवर लिफ्टिंग प्रतियोगिता के आखिरी दिन 120 किलो हैवी वेट वर्ग म आसिफ अली ह कुल 760 किलो वजन उठाके बेंचप्रेस म स्वर्ण पदक हासिल करीन। छत्तीसगढ़ ओलंपिक संघ ह जीते के खुसी म आसिफ अली ल बधई दीन हे।

संक्षिप्त समाचार

- बालोद जिला के संजारीचौकी क्षेत्र के खेरथा बाजार गांव म सरपंच विक्रम सिन्हा के हत्या कर देगे हवय। पुलिस ह आरोपी पोस्टमास्टर रामजी प्रजापति ल गिरफ्तार कर लेहे।
- राजनांदगांव के एक ठिन बेपारी ले केवाईसी अपडेट करे के नांव म 3 लाख 70 हजार रूपिया के ठगी करे के मामला आगू आय हवय। पुलिस ह ए मामला के जांच करत हे।
- कोंडागांव जिला के फरसगांव पुलिस ह एक अंतर्राज्यीय गांजा तस्कर ल गिरफ्तार करीन हवय। आरोपी के चारपहिया गाड़ी ले 121 किलो ले जादा के गांजा बरामद करे गे हवय, जेखर कीमत 12 लाख रूपिया बताय गीस हवय।

\*\*\*\*\*  
\*\*\*\*\*